

Date – 14/01/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Tunhnaia an sahimna zawnga Bangladesh atanga Lawngtlai District a lut mi 28 te chu Inrinni khan Lawngtlai District atangin thawnkir an ni.
2. Mizoram State Sports Council leh Samagra Shiksha chuan Mizoram Sports tihmasawna tura Inremna thuthlung an ziak.
3. Prime Minister Narendra Modia chuan nimin khan Central Kashmir-a Ganderbal district-a Sonamarg Tunnel a hawng.
4. Nimin Mahakumb ni khatnaah mi vaibelchhe khat leh nuai 50 chuang tui thianghlimah an inchiah



REFUGEES PUSH BACK

Assam Rifle atanga thudawn danin, tunhnaia an sahimna zawnga Bangladesh atanga Lawngtlai District a lut mi 28 te chu Inrinni tlai dar 6 khan Zorinpui, Lawngtlai District atangin thawnkir an ni.

Heng Bangladesh Refugee 28 hi Assam Rifle ten an sawidan chuan ni 5 khan Lawngtlai District ah rawnlutin, an zingah puitling Mipa 8 leh Hmeichhia 5 an awm a, naupang 15 awmin naupang 15 zinga 9 chu nausen an ni.

Heng Bangladesh Refugee te hi hun engemawchen kawh an nih hnu ah Inrinni tlai dar 6 khan Zochahchhuah piah Zorinpui bul, Sekulh lui atangin Samang (Bangladesh) ah thawnkir an ni.

Assam Rifle ten an sawidanin Refugee te thawnkirna ah hian Bungtlang South BDO bakah Bungtlang South leh Vaseikai Police te pawh an tel a ni.



LAWNGTLAI

'Lawngtlai District Level Committee on Border Protection Grid' chu an Chairman, Pu Cheemala Siva Gopal Reddy, Lawngtlai District Bawrhsap nibawk hovin a Office Chamber-ah nimin khan an thukhawm a.

Pu Cheemala Siva Gopal Reddy chuan thenawm ram Myanmar leh Bangladesh atanga raltlan lo lut vanga ram chung himna leh ralmuanna a derthawn loh nana ramri ven himna kawnga tan lak lehzual a pawimawh thu a sawi a. Assam Rifles leh BSF -te chu thawhho na tha tak nei a, uluk zawka ramri venhim hna thawk thin turin a chah a. Bawrhsap chuan Lawngtlai mipuite a bik takin 'international border' bula awm khuate chu ramri venhim kawnga thahnem ngai taka thawhpui turin a sawm nghal bawk.

Thutkhawmah hian Assam Rifles - hnen aţangin ramri ven himna kawnga an hmalak dan report ngaihthlak a ni a. Myanmar leh Bangladesh nena inrina ramri kana dan phal loh thil tih leh ruihhlo leh ralthuam tawlhrukta a awm loh nana ramri venhim chungchang a thil pawimawh hrang hrang sawiho a ni. Myanmar leh Bangladesh mi leh sa ramri pel a, an chet vel dan vil leh thlithlai zui chungchangah Civil Administrator, BSF, Assam Rifles leh Boarder hnaih khua VC -ten thawhhona tha zawk neih ni se an ti a ni.

<><><>

STATE LIBRARY

Mizoram State Central Library-a State Librarian Pu Zothanglawra Ralte chuan zirlai leh mipuite state library an ta a nih anga hmang tangkai zel turin a sawm.

Pu Zothanglawra Ralte chuan Mizo mipui a tam thei ang berin state library chhawr se a duh thu a sawi a. Zirlai leh hna zawng lai, civil service lam lut duh tan te pawh a hranin nikum atang khan an pual bika siam lehkha dahna hmun ruahman a nih thu a sawi a. Mipui nawlpui leh zirlai te, a hmun ngeia kal a a hlutna hre turin a ngen a. Tunlai thiamna lo sang zelah lehkhabu hlutna a la tlakhniam loh thu a sawi a ni.

Mizoram State Central Library tlawhtu hi nikum chhung khan zirlai 2,688 awmin, research scholar 47 an awm a. Nikum khan member inziaklut thar puitling 549 awmin naupang 67 an awm bawk a. Lehkhabu hawhtu hi puitling 4,116 leh naupang 549 an awm a ni.

Mizoram State Central Library-ah hian tun dinhmunah general category-ah lehkhabu 49,074 awmin naupang lehkhabu 5,924 leh Hindi lehkhabu 17,427 a awm a. A vaiin lehkhabu 72425 a awm a ni.

Tun dinmunah Mizoram State Central Library-ah hian member puitling 8,088 leh naupang 1,390 an awm a, an vaiin 9,478 an ni.

<><><>

VEHICLE REGISTRATION

Transport department hnuaiah kum liam ta, kum 2024 chhung khan Aizawl district-ah lirthei 21,821 ziah luh a ni.

Transport department in Akashvani Aizawl News a hrilh danin kum 2024 chhunga an lirthei ziahluh thar zingah two-wheeler 16,802, Car 3,165, commercial vehicle 1,136, motor cab (taxi) 273, ambulance 16, bus 14 bakah lirthei dang 415 an ziaklut thar a ni.

<><><>

MSSC

Mizoram State Sports Council leh Samagra Shiksha chuan Mizoram Sports tihhmasawna tura Inremna thuthlung (Memorandum of Understanding) an ziak.

Inremna Thuthlung (MoU) hi Sports Minister Pu Lalngthinglova Hmar leh Education Minister Dr.Vanlalhlana hriatpuina hnuaiah MSSC aiawh Pu Henry Lalrawnkima, Secretary MSSC leh Samagra Shiksha aiawh Pu Lalthanzira, SPD, Samagra Shiksha ten an ziak a.

Samagra Shiksha hian Grassroots Level Sports Development (GSDP) an kalpui mek a. Tun sawrkar hian Bana kaih Policy hmalakna peng khat a tan Thalaite theihna haichhuahna Programme Mizoram pum huapa chak taka kalpui a tum mek bawk a. GSDP hian naupang kum 6-18 a huam a, heng programme pahnih te hi Sports hmasawna lama hmalakna tur ve ve a nih a vangin, kalpui tum dan leh a huam chin te in ang diak diak lo mahse thawhduna zaia khata hmalak hian Mizoram chu Sports-ah hmasawna sang zawkah a hlan kai ngei beiseina avanga Inremna thuthlung hi ziah a ni, Minister te hian an ti.

Pu Lalngthinglova Hmar chuan Mizoram Flagship Programme “Bana Kaih Policy” kaltlanga nasa taka Sports tihmasawn nana hmalak tum a ni a. Mizoram pum huapa thalai te theihna haichhuah programme kalpui tum mek a ni a. Hei hian Mizoram chu Sports a tihmasawn bakah Olympic 2036 tinzawna inpuahchahna a ni tel bawk a ni, tiin Samagra Shiksha hnuaia GSDP nen zaikhata luntir hi a remchan bakah changtlung zawk leh chak zawka Sports lama hma sawn theihna tur a ni, a ti.

Education Minister Dr.Vanlalhlana chuan MSSC leh Samagra Shiksha in MoU an ziak chu lawmawm a tih thu sawiin, he MoU kaltlang hian Sports Fund neih ang ang te pawh awmze neih zawk leh tangkai zawka hmanna kawng a hawnphah dawn a, a phurawm hle a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

REIEK

Reiek Tlang Tourism Development Board chuan Reiek tlang lawn tur te tan lirtheia thlen theih anih hnua harsatna hrang hrang a thleng chho tih sawiin, helai tlang lawn tur te tan ruahmanna siam thuai an beisei tih an sawi.

Reiek Tlang Tourism Development Board Secy Pu Vanlalmaka chuan Akashvani zawhna chhangin Sorkarin kawng a siam that hnua nikum November thla tir khan tlanga tlan chho lirthei nasa takin an pung a, traffic jam avanga buaina a thlen bakah cancer damdawi anga thang, nauban a rem duak bawk a, hemi avang hian nikum November ni 3 khan Board an thutkhawm a, gate siamin lirthei lut tur an dang lailawk a, Gate tichhiaa mipuite an la luh zel avangin lirthei luh man two wheeler-ah cheng 100 leh lirthei ke 4 nei cheng 500 an la taa, ni 2 chiah an kalpui hman tihah traffic jam nasa vang bawkin an tihtawp leh a, hemi hnu hian tlang thleng thei tur bik lirthei service an siam ta tih a sawi a ni.

Pu Vanlalmaka chuan mipuiin lirthei hmanga an chin phul nasat avang hian Reiek tlangin a tawrh an hlauh avangin lirthei service tir an ni tih a sawi a, mipuite a tam thei ang ber kein la kal chhunzawm se an duh thu an sawi a. Tar leh upa, damlo chaklo te tan lirtheia an kal theihna remchang atan leh rikrum thilah pawh kawng chu tangkai taka hman ni se an duh a, amaherawhchu lirthei nei zawng zawngin an zawh chuan harsatna liantham a thleng thei a ni a ti.

Tourism Director Pi R. Lalrodingi chuan Reiek tlang chu tlang taka an department in an va relbawl loh thu a sawi a. Minister a zin mek thu sawiin a lo haw velah Reiek Tlang Tourism Development Board te leh department te ruahmanna tha zawk a awm zel beiseiin an thutkhawm dawn tih a sawi a ni. Kan corr report lo ngaithla ang.

<><><>

PM

Prime Minister Narendra Modia chuan nimin khan Central Kashmir-a Ganderbal district-a Sonamarg Tunnel a hawng. Thusawiin PM Modia chuan Jammu and Kashmir chu leiverh, lei leh ropeway tamna hmunpuiah a chang chho mek a ti a. Cheng vaibelchhe 42,000 hu inkalpawhna hna thawh mek a ni a ti bawk.

He hunah hian Union Minister Nitin Gadkari, Dr.Jitendra Singh, J&K Lt. Gov Manoj Sinha, Chief Minister Omar Abdullah, Senior UT Minister te, Parliament Members, Legislator leh senior Tunnel Project Official te an tel a ni. Prime Minister hian Tunnel chhungah hian lutin a fang kual bawk a. Sonamarh Tunnel hian Gagangeer leh Sonamarg inkar tlan chhung chu minute 20-25 laiin a ti tlem dawn a ni.

<><><>

MAHAKUMBH

Nimin Mahakumb ni khatnaah mi vaibelchhe khat leh nuai 50 chuang tui thianghlimah an inchiah. Khawvel huapa sakhaw thila intawhkhawm lian ber Mahakumbh nimin khan Uttar Pradesh-a Prayagraj ah tan a ni a. Sakhaw biakzina kal mi maktaduai chu Ganga, Yamuna leh Saraswati te infinna Triveni Sangam-ah inchiah thianghlim turin an kalkhawm a. He hunpui hi Febraury ni 26, Mahashivaratri thleng hman a ni dawn a. Mahakumbh hman chhung hian sawrkar chuan venhimna khauh takin a kalpui a ni.

Union Tourism and Culture Minister Gajendra Singh Shekhawat chuan Maha Kumbh 2025 chu sakhaw thila inhmuhkhawm mai niloin thil pawimawh tak khawvel khualzinte pawh hiptu a ni a ti a. Akashvani News in a kawmnaah he thu hi sawiin Pu Shekhawat-a chuan he hunpui thleng turah hian Union Tourism Ministry chuan hmalakna chi hrang hrang a kalpui a, tualchhung leh rampawn atanga khualzinte hip turin theihtawp a chhuah a ni a ti.

<><><>

HAI AGREEMENT

India leh Saudi Arabia chuan Haj inremna 2025 an zia. Nimin Khan Union Minority Affairs Minister Kiren Rijju leh Saudi Arabia Minister for Haj and Umrah Tawfig Bin Fawzan Al-Rabbiah ten Jeddah khawpuiah inremna an zia a. Muslim sakhaw hun pawimawh Haj lo thleng turah India mi nuai 1 sing 7 leh sang nga te tan qouta hauh sak a ni ang.

PRime Minister Narendra Modia chuan inremna ziah tak chu fakin sawrkarin sakhaw biakzina kalte hamthatna a ngai pawimawh tih tarlang tu a ni a ti.

